

文山先生全集

八

鄭氏藏書
PDC

文山先生全集卷之十四

別集

指南後錄卷之一上

過零丁洋

苦遭逢起一經干戈落落四周星山河破碎風拋絮身世飄搖雨打萍皇恐灘頭說皇恐零丁洋裏歎零丁人生自古誰無死留取丹心照汗青

上巳日張元帥令李元帥過船請作書招諭張少保投拜遂與之言我自救父母不得乃教人背父母可乎書此詩遺之李不能強持詩以達張但稱好人好詩竟不能逼

元夕

南海觀元夕茲遊古未曾人間大競渡水上小燒燈世事
爭強弱人情尚廢興孤臣腔血滿死不愧廬陵

懷趙清逸

厓海真何地驅來坐戰場家人半分合國事決存亡一死
不足道百憂何可當故人髯似戟起舞爲君傷

二月六日海上大戰國事不濟孤臣天祥坐北舟
中向南慟哭爲之詩曰

長平一坑四十萬秦人歡欣趙人怨大風揚沙水不流爲
楚者樂爲漢愁兵家勝負常不一紛紛干戈何時畢必有

天吏將明威不嗜殺人能一之我生之初尚無疚我生之
後遭陽九厥角稽首併二州正氣掃地山河羞身爲大臣
義當死城下師盟愧牛耳間關歸國洗日光白麻重宣不
敢當出師三年勞且苦只尺長安不得覩非無虢虎士如
林一日不戈爲人擒樓船千艘下天角兩雄相遭爭奮搏
古來何代無戰爭未有鋒蝟交滄溟遊兵日來復日徃相
持一月爲鷓鴣蚌南人志欲扶崑崙北人氣欲黃河吞一朝
天昏風雨惡炮火雷飛箭星落誰雌誰雄頃刻分流屍漂
血洋水渾昨朝南船滿厓海今朝只有北船在昨夜兩邊
桴鼓鳴今朝船船鼾睡聲北兵去家八千里椎牛醢酒人

人喜惟有孤臣雨淚垂冥冥不敢向人啼六龍杳靄知何處大海茫茫隔煙霧我欲借劍斬佞臣黃金橫帶爲何人

又六噫

颶風起兮海水飛噫文武盡兮火德微噫鷹鷂相擊兮靡所施噫鴻鵠欲舉兮將安歸噫權歌中流兮任所之噫獨抱春秋兮莫我知噫

言志

九垓化爲魅億醜俘爲虜既不能變姓名卒於吳又不能髡鉗奴於魯遠引不如四皓翁高蹈不如仲連父冥鴻墮矰繳長鯨陷網罟鷄燕上下爭誰何螻蟻等閑相爾汝狼

藉山河歲云杪飄零海角春重暮百年落落生涯盡萬里
遙遙行役苦我生不辰逢百罹求仁得仁尚何語一死鴻
毛或泰山之輕之重安所處婦女低頭守巾幘男兒嚼齒
吞刀鋸殺身慷慨猶易免取義從容未輕許仁人志士所
植立橫絕地維屹天柱以身殉道不苟生道在光明照千
古素王不作春秋廢獸蹄鳥跡交中土閨位適在三七間
禮樂終當屬真主李陵衛律罪通天遺臭至今使人吐種
瓜東門不可得暴骨匈奴固其所平生讀書爲誰事臨難
何憂復何懼已矣夫易簣不必如曹參結纓猶當效子路

南海

竭來南海上人死亂如麻腥浪拍心碎颼風吹鬚華一山
還一水無國又無家男子千年志吾生未有涯

有感

海闊龍深蟄山空鳥雜鳴花隨春共去雲與水俱行壯士
千年志征夫萬里程夜涼看星斗何處是攬槍

張元帥謂予國已亡矣殺身以忠誰復書之予謂
商非不亡夷齊自不食周粟人臣自盡其心豈論
書與不書張爲改容因成一詩

高人名若晚烈士死如歸智滅猶吞炭商亡正採薇豈因
微後福其肯蹈危機萬古春秋義悠悠雙淚揮

登樓

茫茫地老與天荒如此男兒鐵石腸
七十日來浮海道三千里外望江鄉
高鴻尚覺心期闊蹇馬何堪腳跡長
獨自登樓時柱頰山川在眼淚浪浪

海上

天邊青鳥逝海上白鷗馴
王濟非癡叔陶潛豈醉人得官
須報國可隱即逃秦身事盃棺
定挑燈看劍頻

贛州

滿城風雨送淒涼三四年前此戰場
遺老猶應愧蜂蟻故交已久化豺狼
江山不改人心在宇宙方來事會長
翠玉

樓前天亦泣南音半夜落滄浪

指南後錄卷之一下

出廣州第一宿

越王臺下路搔首歎萍蹤城古都招水山高易得風鼓聲
殘雨後塔影暮林中一棧連營火山同河不同

英德道中

海近山如沃杼深屋半蕪乾坤正風雨軒冕總泥途自歎
寫肩薄誰憐鶴影孤少年狂不醒夜夜夢伊吾

晚渡

青山圍萬壘流落此何邦雲靜龍歸海風清馬渡江汲灘

供茗椀編竹當蓬窓一井沙頭月羈鴻共影雙

珊瑚吟

南方有珍禽鳴聲天下奇毛羽黑如漆兩臉凝瑤脂燕趙
佳公子籠檻以自隨童子重丁寧飲食必以時將獻上林
苑來巢萬年枝待之豈少恩不免加縶維珊瑚真珊瑚碎
琢良自悲中原寒氣深風土非所宜

和中甫端午韻不依次

黃茅古道外羸馬發南州有客嗤齊魯何人念楚囚歲年
付流水風雨滿滄洲手把菖蒲看黑頭非所求

又呈中齋

風雨羊腸道飄零萬死身牛兒朝共載木客夜爲隣庾子
江南夢蘇郎海上貧悠悠看晚渡誰是濟川人

又

萬里論心晚相看慰亂離丹成俄已化璧碎尚無緇禾黍
西原夢川原落日悲斯文今已矣來世以爲期

竹間

倦來聊歇馬隨分此青山流水竹千箇清風沙一灣乾坤
醒醉裏身世有無間客路真希絕浮生半日閑

越王臺

登臨我向亂離來落落千年一越臺春事暗隨流水去潮

聲空逐暮天迴煙橫古道人行少月墮荒村鬼哭哀莫作
楚囚愁絕看舊家歌舞此銜盃

南華山

北行近千里迷復忘西東行行至南華忽忽如夢中佛化
知幾塵患乃與我同有形終歸滅不滅惟真空笑看曹溪
水門前坐松風

六祖禪師真身蓋數百年矣爲亂兵刳其心肝乃知有患難佛不免况人乎

南安軍

梅花南北路風雨濕征衣出嶺誰同出歸鄉如不歸山河
千古在城郭一時非饑死真吾志夢中行採薇

黃金市

閉蓬絕粒始南州我過青山欲首丘
巡遠應無兒女態夷齊肯作稻粱謀
人間早見黃金市天上猶遲白玉樓
先子神遊今二紀夢中揮淚濺松楸

萬安縣

青山曲折水天平不是南征是北征
舉世更無巡遠死當年誰道甫申生
遙知嶺外相思處不見灘頭皇恐聲
傳語故園猿鶴好夢回江路月風清

泰和

書生曾擁碧油幢耻與群兒共豎降
漢節幾回登快閣楚囚今度過澄江
丹心不改君臣誼清淚難忘父母邦
惟有

鄉人知我瘦下帷絕粒坐蓬窓

蒼然亭

風打船頭繫夕陽亭前老子舊胡床青牛過去關山動白
鶴歸來城郭荒忠節風流落塵土英雄遺恨滿滄浪故園
水月應無恙江上新松幾許長

別里中諸友

青山重回首風雨暗啼猿楊柳溪頭釣梅花石上尊故人
無復見烈士尚誰言長有歸來夢衣冠滿故園

發吉州

已卯六月初一日蒼然亭下楚囚立山河顛倒紛雨泣已

亥七夕此何夕煌煌斗牛劍光濕戈鋌彗雲雷電擊三百
餘年火爲德須臾風雨天地黑皇綱解紐地維折妾婦偷
生自爲賊英雄扼腕怒鬚赤貫日血忠死窮北首陽風流
落南國正氣未亡人未息青原萬丈光赫赫大江東去日
夜白

臨江軍

江岸今多嚙城居昔屢焚市人半傖父豎子亦將軍蛟哭
金洲雨猿啼玉觀雲周卽墳土上回首淚成痕

予始至南安卽絕粒爲告祖櫺文別諸友詩遣孫禮取
黃金市登岸馳歸約六月二日復命於吉城下予以心

事曰諸幽明即瞑目長往含笑入地矣乃水盛風駛前
一日達廬陵孫禮期不至予且行忍死以待垂至豐城
忽有見孫禮於他舟乃悟竟不曾往爲之痛哭流涕暮
始見主者取孫禮還舟明早遂送之豐城縣縱其自便
追之不可及矣予至是不食已八日若無事然私念死
廬陵不失爲首丘今使命不達委身荒江誰知之者盍
少湏臾以就義乎復飲食如初昔讀左傳申包胥哭秦
庭七日勺飲不入口亦不聞有它乃知饑踣西山非一
朝之積也予嘗服腦子二兩不死絕食八日又不死竟
不曉其何如從者七人或逃或死或逐今僅存一人曰

劉榮楚囚之况宜哉

隆興府

半生幾度此登臨
流落而今雪滿簷
南浦不知春已晚
西山但覺日初陰
誰憐龜鶴千年語
空負鵬鴒萬里心
無限故人簾雨外
夜深如有廣陵音

湖口

江湖一都會
宇宙幾興亡
走馬蘆林外
買魚茅舍傍
南人桴快槳
北客坐危檣
江水交岷水
東流日夜長

安慶府

風雨宜城路
重來白髮新
長江還有險
中國自無人
梟鏡